

KUASA AGAMA DI PERSEKUTUAN TANAH MELAYU

DENGARLAH AZAN!

(oleh Edrus)

Di dalam hujung makalah yang lalu saya telah meletakkan suatu perkataan daripada orang-orang kita sendiri, yang pada masa itu dibanggakan sebagai penganjur bangsa yang bekerja juga konon-kononnya untuk agama tetapi yang sebenarnya, telah zahir kemudiannya ianya sebagai perkakas yang dijadikan orang untuk melemahkan kedudukan agama – bukti-buktinya tidak payah saya terangkan dan masing-masing kita telah pun mengetahuinya.

Dengan sebab-sebab dan sedikit-sedikit keterangan yang telah saya beri dalam makalah yang berlaku di sekeliling kita hari ini mestilah berfikir dari sekarang memerhati keadaaan-keadaan di sekeliling kita supaya dapat kita membuat suatu cagaran sebelum luput masanya yakni sebelum perkara-perkara yang menjadi hak kita itu telah pun pupus dan terlepas daripada tangan kita dengan di dalamnya kita masih terharap-harap kepada perkataan yang manusia, kepada akuan-akuan yang tak putus-putusnya diberi kepada kita dari satu ke suatu masa pada hal boleh dikata tidak satu pun yang telah dijalankan bahkan nampaknya dari satu ke suatu masa segala hukum-hukum dan tegahan-tegahan agama dilakukan dengan rasmi oleh pihak atau suku orang yang kita harap itu.

Di dalam semua kejadian-kejadian yang telah dibawa, dengan tiada hendak diselindungkan walau sedikit pun, kebanyakan daripada kita orang Islam hanya berdiri di tepi pagar sebagai penonton kepada masalah yang ada ke ayat mengayat dengan kita bahkan kita melihat tidak sudah-sudahnya tiap-tiap suatu itu digunakan oleh sebahagian pihak hanya sebagai dijadikan tapak untuk meningkat kepada suatu tujuan yang tertentu yang diutamakan oleh mereka untuk mencari faedah diri sendiri yang kesannya, dengan kerana itu, faedah yang ada kepada kita pupus

dengan kerana kita duduk di tepi pagar sebagai penonton.

Orang-orang Melayu harus tidak dapat menafikan bahawa pada masa ini tidak ada suatu jalan yang dapat mendirikan hak orang-orang Melayu selain daripada menetapkan kekuasaan hak beragama di dalam tiap-tiap buah negeri Persekutuan Tanah Melayu yang dipunyai oleh orang-orang Melayu dengan Raja-rajanya itu ditegakkan dengan disusun dan diatur sebegitu rupa dengan tidak ada satu kuasa pihak pertadbiran British boleh menghalang atau mengacau kuasa-kuasa itu apalagi anak-anak dagang adalah jauh sama sekali- yang demikian ini bersalahan dengan suatu pertubuhan yang diasaskan kepada bangsa di dalam mana anak-anak dagang yang telah bermastautin di sini atau pun yang baharu tiba di sini dapat mencari suatu helah dan jalan menuntut persamaan di dalam hak-hak yang termaklum yang bukti-buktinya kita telah berjalan dengan sebegitu cepat dari satu ke suatu masa.

Dengan sebab itu adalah menjadi suatu harapan yang utama sekiranya perbuatan atau langkah untuk menuju suatu pertubuhan agama yang berdisiplin tidak dicemburui oleh sesuatu pihak yang berdasarkan bangsa yang telah memberi pandangan bahawa tidak patut tertubuh suatu pertubuhan itu kerana telah ada kedudukan mereka yang “menjalankan juga kerja agama”. Mereka mesti faham dan mesti menjauhkan pandangan bahawa ada masih banyak lagi mereka yang di luar pagar yang dari dahulu hingga sekarang menjadi penonton di luar pagar yang bilangannya masih tersangat banyak jika dipandang atau dibanding dengan banyaknya penduduk-penduduk Islam di negeri ini. Mereka itu wajib disatukan terutamanya apabila kita memerhati keadaan-keadaan sekarang yang boleh kita pandang sendiri suaranya boleh dikata tidak tajam lagi sebagaimana pada permulaan dahulu. Yang demikian ini bertambah lagi apabila kita melihat bahawa tidak ada ketetapan atas “dasar perjuangan” yang dibawa untuk mendirikan hak dan taraf orang Melayu

di negerinya sehingga kalau kita perhati bahawa tidak ada ketentuan suatu rancangan yang dituju. Kita telah melihat apabila dijalankan sesuatu rancangan adalah rancangan itu semata-mata bukannya kehendak daripada pertubuhan itu tetapi yang dijalankan nampaknya adalah mengikut kehendak dan kemahuan beberapa kerat daripada mereka itu yang di dalamnya pula harus tidak tersembunyi tiap-tiap seorang daripada mereka harus pula mengawal atau menjaga maslahat diri masing-masing.

Adalah menjadi suatu perkara yang sangat bijak, sekiranya penganjur-penganjur bangsa sayang kepada tanah air mereka, bagi mereka menggalakkan suatu pertubuhan baharu yang berdisiplin sebagai suatu cagaran untuk berpindah tapak tatkala nanti kita terdesak oleh keadaan-keadaan yang merbahaya yang desakannya semakin kuat dan semakin keras kepada bangsa Melayu. Yang demikian ini sepatutnya adalah digalakkan kerana ia menjadi suatu tapak yang dengannya lah, menurut telahan saya, orang-orang Melayu akan dapat diselamatkan daripada bahaya-bahaya yang menimpa kita yang riak-riaknya bolehlah dikatakan hampir-hampir tidak dapat dipertahankan lagi oleh orang-orang Melayu.

Binaan di atas perkara yang tersebut ini sangat mustahak difikir dan dihalusi. Menurut pendapat saya, inilah suatu jalan yang dapat kita mendirikannya dengan tidak dicampuri oleh orang lain dan setelah kita dapat mencapainya tentulah kita tidak terigau-igau berfikir kepada perkataan yang sebegini yang meriahnya dihidupkan oleh orang untuk memberi kemerdekaan kepada kita, digalakkan kita merdeka tetapi, di sebalik itu kita diketahui oleh mereka tak dapat melayukkan diri kita memegang kemerdekaan melainkan bersama-sama dengan tukang-tukang penggalak dan anak-anak dagang yang memang sudah diletakkan suatu acuan atasnya oleh suatu rancangan “menuju kepada kemerdekaan” yang disorak-sorakkan itu.

Islam sememangnya telah mengajar kepada kita bahawa kita merdeka semenjak kita keluar dari perut ibu kita dengan seluas-luasnya makna. Kemerdekaan tiap-tiap seorang itu tidak akan dapat kekal melainkan dengan orang itu sendiri bekerja dan berusaha meletakkan ia supaya

merdeka. Ia tidak boleh berharap orang lain memerdekakannya kerana apabila ia berharap kepada orang lain adalah bermakna ia telah menghilangkan kemerdekaannya dan yang demikian telah terang digambarkan oleh agama Islam bahawa hina sungguh kedudukan seseorang itu berharap kepada tenaga orang lain untuk keselamatan dan kesejahteraan diri sendiri.

Misal ini pembaca-pembaca tentu telah melihat apa yang terjadi dalam lingkungan kita. Di dalam perjanjian Persekutuan Tanah Melayu adalah dikatakan bahawa menjadi suatu kewajipan kepada pihak pertadbiran yang berikat dengan Sultan-sultan Melayu melayukkan orang-orang Melayu itu boleh mentadbir hal ehwal negerinya sendiri yang menuju kepada kemerdekaan tetapi dengan malangnya sendi-sendik untuk mencapai kemerdekaan itu nampaknya dari satu ke suatu masa dilemahkan dan kalau pun ada yang dijalankan kepada tujuan yang tersebut bolehlah disifatkan semata-mata sebagai topeng untuk mengaburi mata mereka yang tidak mengetahui ke mana jalan kita dibawa. Di sebalik itu kita memandang bahawa anak-anak dagang sebegini galak naik dan bangkit dan berdiri serta berpekkik mendatangkan tuntutan-tuntutan yang ia menguatkan lagi perdirian mereka di sini. Dengan itu apakah maknanya kemerdekaan yang begitu kepada bangsa kita Melayu? – Jawabnya harus tidak payah dicari. Ketua-ketua kita yang dikatakan “mas’ul” nampaknya selalu kena gosok tenguk dan akhirnya kita melupakan apa yang patut kita buat.

Oleh sebab itu hendaklah kita sedar dan insaf bagaimana kita telah dilambung-lambungkan oleh ombak permainan yang sebegini indah bunyinya sehingga kita telah membelaikan hak-hak kita yang ada dan masih ada iaitu hak agama kita yang bebas di dalam tiap-tiap buah negeri Melayu itu. Hak-hak beragama di dalam tiap-tiap buah negeri itu adalah meliputi kepada semua perkara yang bersabit dengan agama. Sultan-sultan Melayu itulah pemegang tumpuk mengikut undang-undang, untuk menjalankan hak-hak agama di negeri ini. Tetapi harus sebahagian daripada mereka itu dengan penasihat-penasihatnya orang Melayu tidak berani mendirikan hak agama itu harus

dengan sebabnya tidak ada satu dorongan yang kuat dari belakang yang mendesak mereka itu supaya jangan berpaling daripada mendirikan barang yang hak. Kita telah melihat bagaimana suatu kehinaan harus bagi permulaannya, bagaimana harus mereka tidak mendirikan hak mereka kepada barang yang menghina iaitu seperti gambar “Nabi Daud” – sebagai misalnya. Tidakkah ini masalah agama yang tiap-tiap negeri itu boleh mendirikan haknya untuk menahan suatu perkara yang bukannya sahaja mengenai umum bahkan telah memalitkan coreng yang hitam di muka Sultan-sultan itu – mengapa saya katakan begitu? Jawabnya harus begini – kerana tidak mahu mendirikan hak keagamaan yang memberi hina kepada rakyat yang insaf dan kasihkan agama di dalam tiap-tiap daerah itu.

Beginilah yang telah kita lihat dan beginilah perkara yang terjadi dan yang akan terjadi lagi sekiranya Sultan-sultan itu tidak menginsafi bahawa yang menjadi rakyatnya itu ialah orang-orang Islam. Dengan penerangan ini sangat-sangat diharap supaya mereka itu menginsafi bahawa tidak ada suatu jalan yang boleh melepaskan orang-orang Melayu selain daripada Sultan-sultan itu sendiri menggalakkan di dalam tiap-tiap buah negeri itu tertubuh suatu pertubuhan Islam yang terdiri daripada orang-orangnya yang ikhlas dan berani berkata benar – bukan daripada mereka yang bermuka-muka – tetapi hendaklah terdiri daripada orang-orang yang boleh memahamkan kepada ramai bahawa Islam itu terikat di dalam jiwa yang satu dan yang berani memahamkan kepada mereka itu bahawa tiap-tiap pemeluknya, tiap-tiap sendi masyarakat dari satu ke suatu masa dituntut berjihad kepada jalan Allah, berjihad setiap-setiap masa dan setiap-setiap saat menunaikan tuntutan agama di atas mereka itu dengan berbagai-bagai cara maknanya yang di antaranya membentuk suatu ikatan bersama untuk mentadbirkan hal ehwal kita bersama iaitu dengan cara bekerja menyokong jabatan-jabatan agama kita supaya jabatan-jabatan itu meliputi sebagaimana hak dan kemahuan kita untuk kita bersama.

Hal sedemikian itu sangat perlu dan inilah sahaja

suatu jalan, menurut pandangan saya, yang kita dapat tempuh hari ini. Jabatan agama itu sekarang hanya sebagai suatu tubuh yang tidak bermaya sebab kita tidak mempunyai persatuan untuk menghidupkannya. Pertadbirannya terpulang kepada usaha-usaha jabatan itu sahaja dengan sepandai-pandai pentadbiran-pentadbirannya sedang apabila ia hendak menjalankan kuasa-kuasanya sudah tentu kuasa-kuasa itu akan diambil daripada keputusan Majlis Mesyuarat Negeri itu nanti ahli-ahlinya akan dilantik mengikut pilihan raya.

Dengan kita tidak bersatu adakah kita akan dapat meletakkan wakil kita dan akan memilih wakil kita di dalam majlis itu? Adakah kita akan berharap di dalam usaha-usaha kita itu nanti kepada suatu pertubuhan kebangsaan yang sebahagian orang kita menyokong di dalamnya? Tidakkah kita telah melihat bahawa sebahagian daripada ahli-ahli pertubuhan kebangsaan itu telah memandai-mandai dan membuat sesuatu yang tidak digemari oleh kita?

Ikhwanul Muslimin insaflah!! Insalafah !!!

Tidak lama masanya lagi harus jika kita lengah Perjanjian Persekutuan Tanah Melayu yang mengandungi di dalamnya hak kuasa agama di tangan Sultan-sultan itu akan termansuh dan dimansuhkan bukannya sahaja daripada anak-anak dagang tetapi disertai oleh orang-orang kita. Adakah sesudah hapusnya baharu kita akan menuntut? Adakah sesudah tidak ada lagi kuasa-kuasa itu luput dari tangan kita baharu ulama-ulama kita bertempik dan bertakbir di mana-mana sesudah kita ketinggalan oleh keretapi?

Saudara-saudara insaflah! Ulama-ulama insaflah !! Carilah persatuan dan berilah masa sedikit untuk mengingatkan umat, untuk menyedarkan umat kita yang sedang dibuai orang di dalam buaian terlena tidur mendengar lagu rumba dan samba, mendengar lagu-lagu Misri dan sebagainya sehingga mereka lupa dan tak mendengar lagi azan yang menyeru supaya mereka itu jangan lena tidur menunaikan seruan Allah, menunaikan janjinya supaya berjihad kepada jalan Allah dari satu ke suatu masa.